

instrument II reda francuski da mi kompletiramo naš francuski instrument I reda, a mi bi vama usput jedan Vildov A8. To bi bilo u opštoj koristi, samo što vi u tom slučaju ne bi mogli snimke terestičkom fotogrametrijom dobivene koristiti. Ovo sve sam ti napisao da mi je po tom pitanju savest čista, jer poznajem sve tri vrste instrumenata, a radi se o zajedničkoj opštoj koristi. Ako trebate bliže tehničke podatke u vezi sa nabavkom i moje pismeno mišljenje izvolite se obratiti zvanično na adresu S. G.U. ili Ukropini. Pozdravljam tebe i ostale

Milovan

#### IN MEMORIAM

DOCENT RANKO ZUBER, DIPL.ING. GEODEZIJE



U jutarnjim časovima 29. decembra 1977. godine ugasio se život neumornog radnika i pedagoga.

Pokojni Ranko bio je uvijek u prvim redovima svih društveno-političkih akcija, boreći se za jedan pravi, humani, samoupravni socijalizam, u samoj žiži borbe za nove odnose, na kome je i sagorio rađajući bez odmora do same smrti. Ne misleći na smrt, planirao je kako da završi započeto, kako da ga dovede do kraja. Tako ga je tog kobnog jutra smrt zatekla na izvršavanju započetog zadatka.

Njegovi pedagoški i ljudski kvaliteti, koji su dolazili do izražaja u kontaktima sa ljudima i studentima, učinili su ga

omiljenim nastavnikom, nastavnikom koji je bio i mnogo više od toga za svoje studente.

Zahvaljujući neiscrpoj radnoj energiji bogato akumuliranom znanju i životnom iskustvu dao je značajan doprinos razvoju geodetske i drugih djelatnosti u tuzlanskom bazenu i republici BiH.

Kao predsjednik podružnice SGIG-a Tuzla, doprinio je svojim radom i angažovanjem da društvo geodeta postigne zapažene rezultate, izgradi sadržaj i metod rada, okupi geodetske stručnjake sjeveroistočne Bosne, zbliži ih, razvije dobre odnose i uzajamnu saradnju.

Zuber Ranko, diplomirani inženjer geodezije, docent Rudarsko-geološkog fakulteta Univerziteta u Tuzli, rođen je 21. novembra 1932. godine u Sjetlini, opština Pale. Osnovno obrazovanje stiče u Palama, nižu gimnaziju i srednju geodetsku tehničku školu završava u Sarajevu 1952. godine. Te godine upisuje se na geodetski odsjek Gradjevinskog fakulteta Univerziteta u Beogradu gdje stiče diplomu diplomiranog inženjera geodezije. U toku studija pokazuje izvanredne sposobnosti dobrog stručnjaka, te je uključen u rad ekipe koja vrši geodetska mjerenja u fazi pripremnih radova na hidroenergetskom sistemu Džerdap. Po završetku studija radi kao profesor na Geodetskoj srednjoj tehničkoj školi u Sarajevu, a istovremeno je birač i za asistenta na Višoj geodetskoj školi u Sarajevu u grupu predmeta primjenjene geodezije.

1964. godine konkurisao je na Rudarsko-geološkom fakultetu u Tuzli i izabran u zvanje asistenta sa stalnim radnim odnosom za predmet geodezija i fotogrametrija.

Zbog izvanrednog zalaganja 1966. godine upućen je na specijalizaciju na Rudarski institut u Lenjingradu /SSSR/ sa zadatkom proučavanja primjene terestičke fotogrametrije na površinskim kopovima.

Na postdiplomske studije upisuje se 1969. godine gdje je apsolvirao i trebao da brani magistarski rad na kome je radio pune dvije godine.

U međuvremenu je izradio i habilitacioni rad "Mogućnost primjene elektro-optičkih daljinomjera HP 3800 B kod određivanja deformacije terena nastalih zbog eksploatacije solnog ležišta u Tuzli", i time ispunio uslove za izbor u zvanje docenta Rudarsko-geološkog fakulteta Univerziteta u Tuzli.

Drug Zuber Ranko, je ostavio za sobom preko dvadeset vrijednih naučnih i stručnih radova, vezanih za slijeganje terena u Tuzli. Kao naučni radnik, stručnjak i pedagog u punom zamahu stvaralaštva, tih, miran po prirodi i odmjeren služio je primjerom pregaoca među nastavnim osobljem, voljen i cijenjen u kolektivu radne organizacije.

Član je SKJ od 1961. godine i rezervni vojni starješina u činu kapetana. Vršio je dužnost sekretara Osnovne organizacije Saveza komunista, Rudarsko-geološkog fakulteta od 1972. godine do 1974. godine. Bio je član Savjeta fakulteta u periodu 1974-1976. godina.

1977. godine izabran je za predsjednika Zbora radnih ljudi Rudarsko-geološkog fakulteta.

Gubitak docenta Ranka Zuberu je nenadoknadiv ne samo za Rudarsko-geološki fakultet, nego i za čitavu geodetsku struku, njeno školstvo i nauku.

Čitav njegov život bio je ispunjen samo radom i obavezama koje je tako savjesno izvršavao i kao takav ostaće među kolegama i saradnicima, a naročito mladima, kao svetao primjer radnika i vaspitača.

Skroman, uvijek prijatan sagovornik, ali odlučan u borbi za progres. Volio je ljude i rado im je pomagao, sa posebnim zadovoljstvom je pomagao mladim kolegama, a naročito onim koje je zapazio da vole svoju struku i svoj poziv.

Bio je neobično odan svojoj porodici, uzoran i plemenit suprug, nježan i osjećajan otac.

Svojim dugogodišnjim samopregornim radom zadužio je našu zajednicu, nas kolege i saradnike, svoje učenike i studente, zadužio je sve oko sebe, ali nikom nije ostao dužan.

Slava i hvala Zuberu Ranku, dipl.inž.geodezije!

#### IN MEMORIAM

#### KEVČIĆ ENES - GEOMETAR

Kevčić Enes rođen je 25. marta 1935. godine u Tuzli. Osnovno obrazovanje stekao je u Tuzli, a Srednju tehničku geodetsku školu je završio je 1961. godine u Sarajevu.

Poslije završene Srednje škole zaposlio se u Rudniku Lipnica. Nakon odlaska JNA ponovno radi u Rudniku Lipnica odakle je prešao u Tehnički sektor Rudnika lignita "Kreka" u Tuzli, a zatim u zajedničke tehničke poslove Titovih rudnika "Kreka-Banovići" u Tuzli. Kada je formirana Osnovna organizacija udruženog rada Istraživanje i razvoj prešao je na rad u ovu organizaciju a prilikom formiranja radne organizacije Rudarsko geološki institut i fakultet u Tuzli svoj rad je udružio u Osnovnoj organizaciji udruženog rada Institut za rudarska istraživanja u Tuzli.

Za svo vrijeme je radio na poslovima rudarsko-geodetskih mjerenja. Član je Saveza komunista od 1963. godine. Biran je u rukovodstva Omladinske organizacije, u Savez sindikata, kao i u organe upravljanja Osnovne organizacije udruženog rada. Bio je član Delegacije OOUR-a i izabran za predsjednika Delegacije. Delegiran je u Skupštinu Samoupravne interesne zajednice - komunalne djelatnosti, a ta Skupština ga je izabrala za svog predsjednika. Rezervni je vojni starješina u činu kapetana i član Odbora rezervnih vojnih starješina u Mjesnoj zajednici.

Kao omladinac aktivno se bavio sportom u Fudbalskom klubu "Sloboda", a kasnije u FK "Radnik" iz Lipnice. U osnovnoj organizaciji je bio aktivan učesnik Radničkih sportskih igara. Još od školskih dana ispoljio je